

宋史新編

宋史新編卷八十三

列傳二十五

明南京戶部主事莆田柯維騏著

楊礪

宋湜

王嗣宗

李昌齡

從子紘

趙安仁

子良規
孫君錫

陳彭年

楊礪字汝礪京兆鄆人建隆中舉進士甲科解褐鳳州團練推官歲餘以母疾棄去後詣闕獻書召試學士院累擢屯田員外郎知鄂州以善政聞端拱初眞宗在襄邸遷庫部充記室叅軍初周世宗節制澶州礪贊文見之館接數日世宗入朝礪處僧舍夢古衣冠者曰汝能從乎礪隨往覩宮衛若非人間殿上王者秉珪南向總

三十餘礪升謁之最上者有按置簿錄人姓名礪見已
名居首因請示休咎王者曰我非汝師指一人曰此來
和天尊異日汝主也當問之其人笑曰此去四十年汝
功成予名亦顯矣寤而志之礪初名勵籍作礪遂改之
至是見襄王儀貌卽所夢來和天尊也真宗尹開封礪
爲推官真宗嘗問礪何年及第礪唯唯不對後知其唱
名第一自悔失問重其不伐卽位累遷工部侍郎樞密
副使卒真宗冒雨臨其喪見就舍僻陋甚憫之贈兵部
尚書礪爲文繁無師法有集二十卷

宋浞字持正長安人父溫故晉天福中進士至左補闕

弟溫舒亦進士至職方員外郎兄弟皆有時名湜太平
興國五年進士歷右補闕知制誥與李沆竝命俄判刑
部坐累貶累遷給事中樞密副使從真宗北巡卒年五
十一贈吏部侍郎謚忠定湜風貌秀整器識冲遠好學
美文詞善談論曉音律精奕碁筆法遒媚喜引重後進
又好趨人之急當世士流翕然宗仰之有集二十卷湜
兄泌亦進士溫舒三子沆澥濤沆剛率喜談兵與濤俱
進士澥有清節不仕與种放魏野遊多篇什酬唱云

王嗣宗字希阮汾州人進士甲科補秦州司寇參軍太
宗征河東嗣宗陳邊事召赴行在授大理寺丞通判睦

州改右贊善大夫徙河州帝遣武德卒潛察遠方事嗣
宗械送京師奏曰陛下不委任天下賢俊猥信此輩爲
耳目臣竊不取帝怒其橫械下吏削秩會赦復官累遷
左正言河北轉運副使帝議親征契丹嗣宗疏其必不
至之狀甚見嘉納改左司諫歷駕部員外郎河北轉運
使貝州驍捷卒五十餘人劫庫兵爲亂嗣宗率兵悉擒
之遷虞部郎中賜錢百萬又歷比部郎中淮南轉運使
江浙荆湖發運使楊楚間民有疾惑禱祠不餌藥嗣宗
徹淫廟刻名方州門民俗爲變成平中以漕運稱職進
秩踰年進右諫議大夫爲三司戶部使改監鐵使條上

應奉諸物以及工作減省凡數十萬計改左諫議大夫
知通進銀臺司兼門下封駁事出知并州兼并代部署
州有臥龍王廟每窮冬闔境致祭值風雪老幼道路嗣
宗亟毀之政績聞有詔褒美召拜御史中丞後加兼工
部侍郎權判吏部銓每進見極談當時鉅細事頗輕險
好進深詆參知政事馮拯之短遂結宰相王旦弟旭使
達意爲助旦不之與力庇拯嗣宗大怒知制誥王曾從
妹適孔冕家閨門不睦曾從東封過冕啜茗中毒得良
藥乃解事已暴露曾密疏方行大禮願罷推究宰相亦
以冕先聖後將有褒擢乃隱其事嗣宗獨謂曾誣構懼

反坐乃求寢息會愆雨嗣宗請對言孔冕負冤真宗召詰王旦等具以實對嗣宗理屈復以他辭侵旦旦不與抗乃已明年嗣宗復請對言孔冕冤播人口王曾尚居近班臣請露章以聞帝以語王旦等王欽若曰臣請審問嗣宗若再鞫冕不能自隱何以處之明日嗣宗復對且謝前言之失其强妄多此類將祀汾陰以求興重地思得大臣才兼文武者鎮之拜耀州觀察使知未興軍府真宗作詩寵行時种放得告歸山嗣宗逆於傳舍禮之甚厚放霑醉稍倨嗣宗怒以語譏放放曰君以手搏得狀元耳何足道也初嗣宗就試講武殿搏趙昌言

擢首科故放及之嗣宗愧恨因上疏言所部兼并之
十餘族而放爲之首放弟姪無賴奪編氓厚利願以臣
疏下放賜放終南田百畝徙放嵩山疏辭極詬辱至目
放爲魑魅帝方厚待放令徙居嵩陽避之旣而徙知邠
州兼邠寧環慶路都部署城東有靈應公廟竝山群狐
處焉妖巫挾之爲人禍福前此長吏皆先謁廟然後視
事嗣宗毀其廟燻穴得數十狐盡殺之徙鎮州代邊肅
發肅不法事肅坐貶嗣宗嘗言徙种放掘邠狐按邊肅
爲去三害居二歲擢樞密副使檢校太保與樞密使寇
準不叶累表解職授太傅大同軍節度知許州歷陝州

再表請老且求入覲遣使召還改靜難軍節度以病足
求再知許州不復議休退時寇準爲相命以左屯衛上
將軍檢校太尉致仕嗣宗睦於宗族撫諸姪如已子遺
戒勿得析居令以孝經弓劍筆硯置壙中卒年七十八
贈侍中謚景莊嗣宗事三朝最爲宿舊所至以嚴明御
下尤傲狠凌挫羣類爲中丞日忿宋白郭贇邢昺七十
不請老屢請真宗敕其休致又遣親屬諷激之及嗣宗
晚歲疾甚猶享厚祿徘徊不去嘗謂人曰僕惟此一事
未能免物議云所著有中陵子三十卷

李昌齡字天錫楚丘人第進士歷右贊善大夫通判銀

州京城開金明池昌齡獻詩百韻太宗嘉之擢右拾遺直史館改右補闕出知滁州歷戶部員外郎知廣州廣有海船之饒有言其貪者太宗以爲誣累擢御史中丞參知政事昌齡居位頗異懷無所建明真宗卽位加戶部侍郎坐交結王繼恩貶咸平二年起爲殿中少監王均之亂命知梓州知雜御史范正辭劾其廣舶宿犯亟代還知河陽丁外艱起復以疾求領小郡復得光州就改光祿卿尋請致仕帝曰昌齡素無清譽乃授祕書監遂其請弟昌言至太子中舍昌言子晉卿仲卿耀卿並進士及第從子紘

絃字仲綱進士及第歷官監察御史時召成都府樂工
許朝天等補教坊絃言陛下卽位尚未能顯巖穴之士
而首召伶人非所以廣德美於天下朝天等遂罷歸絃
踐歷中外遷至龍圖閣直學士知秦州卒絃方介有吏
材篤於交游與劉顏爲友顏死移任子恩官其子弟緯
起家三班借職累遷榮州刺史知雄州治兵頗嚴不事
廚傳數與宦者爭利害積公使錢貯米三千斛爲常平
倉奏下其法他州遷西上閣門使留再任卒

趙安仁字樂道洛陽人父孚字大信周顯德初第進士
仕宋爲永寧令有治狀擢宗正丞開寶初置衣庫令孚

主之俄坐事抵罪語在趙普傳中太宗卽位起爲國子
監丞知袁州還知開封府司錄參軍事朝廷議行封禪
孚上封禪頌召拜祕書丞賜緋魚受詔鞫開封獄得其
非辜者卽日授推官遷監察御史出知舒州改殿中侍
御史雍熙中詔詢文武禦戎之策孚奏議以爲近鑒唐
高祖之降禮遠法周古公之讓地諭以禍福示以恩威
議定邊疆永息征戰養民事天濟時利物莫過於此上
嘉之會上賜安仁金紫因問孚年幾安仁對曰臣父年
六十二上曰孚名士也亟召對亦賜金紫未幾卒安仁
早以文藝稱雍熙二年登進士第歷著作佐郎直集賢

院太宗製九絃琴五絃阮時多獻賦頌上嘉文物之盛
悉閱覽訂其工拙時稱安仁李諤楊億辭雅贍召詣中
書獎諭翌日改遷太常丞真宗卽位拜右正言上出師
大名安仁上疏以爲有急務者三大要者五歷工部員
外郎充翰林學士北邊請盟命安仁撰答書獨記太祖
時聘問書式遼使韓杞至首命按伴凡覲見儀制多所
裁定姚東之至又令接伴東之談次頗矜兵強戰勝安
仁曰佳兵不祥之器聖人不得已而用之東之不敢復
言時論翕然稱其得體上自是有意柄用安仁又集和
好以來事宜及采古事作戴斗懷柔錄三卷以獻未幾

以右諫議大夫參知政事大中祥符初議封禪與王欽
若竝爲泰山經度制置使判兗州禮畢復拜工部侍郎
進秩刑部兵部仍兼脩史奉祀又同知禮儀院八年知
貢舉三典春闈擇士平允是故獨無譏誚上再賜詩嘉
之尋知兼宗正卿寺掌王牒安仁重加詳定又爲仙源
積慶圖皆統例精簡史成遷右丞又爲景靈宮副使屢
得對言事改御史中丞卒年六十一贈吏部尚書謚文
定錄其子溫瑜良規承裕安仁質直純慤與物無競家
人僕使未嘗見其喜愠雖至顯寵簡儉若平素時閱典
籍手自讎校三館舊闕虞世南北堂書鈔惟安仁家有

本真宗嘉其好古尤知典故喜誨誘後進成其聲名當世推重之有集五十卷子尚寬在循吏傳

良規字元甫以父任登仕張知白薦之召試賜進士及第積官至尚書工部侍郎知濠州卒良規所至州郡爲政不甚力然善委任佐屬祿賜多分贍族人餘皆輸之酒家子君錫

君錫字無愧性至孝母亡事父良規不違左右夜則寢於傍凡衾裯薄厚衣服寒溫藥石精粗飲食旨否櫛髮翦爪整冠結帶如內則所載者無不親之及登進士第以親故不願仕良規每出必扶掖上下至雜立僕御中

嘗從謁文彥博彥博異其容止問而知之語諸子令視
爲法良規沒調知武強縣歷擢給事中論蔡確章惇不
宜復職大河不可輕議東回蘇軾不可使去朝廷進刑
部侍郎樞密都承旨拜御史中丞君錫素有志行後隨
人低昂無大建明賈易劾軾題詩怨謗君錫卽請正軾
罪宣仁后不悅曰君錫全無執守復以吏部侍郎天章
閣待制知鄭陳澶三州河南府徙應天因清明出郊具
奠謁杜衍張昇張方平趙槩王堯臣蔡抗蔡挺之瑩邀
七家子孫陪祭於側時人傳其風義紹聖中貶少府少
監分司南京卒贈徽猷閣直學士

陳彭年字永年撫州人幼好學年十三著皇綱論萬餘言爲江左名輩所賞在場屋間頗有雋名然佻薄好嘲咏頻爲宋白所黜雍熙二年始中第歷遷祕書郎喬惟岳刺史海州及知蘇壽二州竝表彭年通判州事咸平三年屢上疏言事召試學士院遷祕書丞知金州四年上疏曰夫事有雖小而可以建大功理有雖近而可以爲遠計者其事有五一日置諫官二曰擇法吏三曰簡格令四曰省冗員五曰行公舉景德初代還直史館兼崇文院檢討又代潘慎脩起居注獻大寶箴三年遷右正言充龍圖閣待制大中祥符中附王欽若丁謂詳定

封禪儀注辨正包茅之用累遷右諫議大夫兼祕書監
賜勳上柱國嘗因奏對真宗謂之曰儒術汙隆係國家
崇替又謂君之難由乎聽受臣之不易在乎忠直彭年
曰陛下聖言精詣足使天下知訓願躬演睿思著之篇
翰真宗爲製崇儒術爲君難爲臣不易二論示之彭年
復請示輔臣刻石國子監六年召入翰林充學士兼龍
圖閣學士同脩國史彭年嘗謁王旦旦辭不見翌日見
向敏中敏中以彭年所上文字示旦旦瞑目不覽曰是
不過興建符瑞圖進取耳真宗奉祀亳州太清宮丁謂
爲經度制置使以彭年副之又與謂同知禮儀院又爲

天書同刻玉副使擢至刑部侍郎參知政事判禮儀院
充會靈觀使天禧大禮爲天書儀衛副使又爲參詳儀
制冊寶使進兵部侍郎卒上臨哭久之又覩所居陋弊
歎息數四贈右僕射謚文僖錄其子孫彭年性敏給博
聞強記慕唐四子爲文體制繁靡位至通顯奉養無異
貧約所得奉賜惟市書籍朝廷典禮無不參預刑名之
學皆所詳練若前世所未有必推引依據以成就之故
時政大小日有諮訪應答該辯一無凝滯皆與真宗意
諸內閣專任形神皆耗舉止失措顛倒冠服家人有不
記其名者所著文集百卷唐紀四十卷

論曰楊礪以際會躋顯榮未聞佐時明略獨棄官將母
庶云克孝宋湜優文藝名動人主至於樂善好施繫天
下士大夫之心其高誼何如趙安仁匪直才辨臣平居
簡儉精典籍後進賴以造就斯盛德君子歟王嗣宗才
兼文武所至克舉其職然性剛凌人年耆戀祿可謂不
遜而鮮恥矣李昌齡初緣獻詩蒙主眷物議不能搖其
後竟以徇貨黨邪取敗倖可以屢僥乎陳彭年附王欽
若丁謂輩與符瑞以蕩上心世號五鬼奚用嗜學詳儀
制爲哉

韓丕

師頌

張茂直

梁顥

子固

楊徽之

楊徽

呂文仲

王著附

呂祐之

潘慎脩

杜鎬

韓丕字太簡華州鄭人父杲仕晉爲曲陽縣主簿陷於契丹母改適他氏丕幼孤貧有操尚讀書于灤山嵩陽通周易禮記爲人講說常有山林之志太宗初第進士聲名籍甚嘗著孟母碑返魯頌人多諷誦之解褐大理評事通判衡州石熙載薦其文行代還試中書擢著作佐郎直史館賜緋魚未幾改左拾遺遷職方員外郎知制誥又加虞部郎中丕屬思艱澀及典書命傷於稽緩宰相宋琪性褊急常加督責又舍人王祐以前輩負氣

每陵轢面折之不能平乃表求外郡知虢州就改職
方郎中端拱初拜右諫議大夫賜金紫知河陽濠州不
起寒素以冲澹自處不奔競於名宦太宗甚嘉重之後
召入爲翰林學士終以遲鈍不敏於用俄罷職充集賢
殿脩撰知均州歷知滁州就加禮部侍郎卒不純厚畏
慎似不能言者雖不優吏事能以清介自持時稱其長
者云

師顏字霄遠內黃人父均後唐長興二年進士顏少篤
學與兄頌齊名建隆二年舉進士上第累遷監察御史
通判未興軍府坐秦王廷美假公帑緡錢左授乾州團

練副使歷殿中侍御史知資眉二州頴所至以簡靜爲
治蜀人便之代還遷侍御史知安州賜緡錢二十萬移
朗州超拜工部郎中命知陝州賜金紫改刑部郎中未
幾召還真宗以其舊人素負才望而久次于外累召對
詢其文章頴謙遜自晦益嘉之命以本官知制誥兼史
館脩撰歷翰林學士知審官院通進銀臺封駁司兩典
貢舉卒年六十七詔遣官護葬給其子仲回祕書丞奉
終喪頴曠達夷雅摺紳慕其操尚有集十卷仲回進士
及第

張茂直字林宗兗州瑕丘人開寶二年登進士第歷祕

書丞參知政事李至稱其端實命入益王府爲記室參軍王好學嘗遣使徵詩援筆而就真宗居藩時茂直與朱昂竝在諸王府每預宴集屢因酬唱識其名卽位選用舊臣得茂直及昂與梁周翰師顏輩相繼知制誥茂直淳至寡言晚年多疾才思梗澀不稱職改祕書少監知潁州卒年七十五子成列進士及第

梁顥字太素須城人初舉進士不中第留闕下獻疏謂方今科名之設俊造畢臻奈何所取不出於詩賦策論其間闕茸妄進濫廁科場者間亦有之聖人在上內君子而外小人若薰蕕同器甚非所以正人倫厚風俗也

不報雍熙二年復舉進士賜甲科解褐大名府觀察推官歷開封府推官三司關西道判官轉太常博士丁內艱起令赴職改右司諫真宗初詔群臣言事顥時使陝西途中作聽政箴以獻還爲度支判官咸平中扈蹕大名詔訪群臣邊事顥上疏曰臣聞用兵之道在明賞罰兵法曰罰之不行譬如驕子之不可用又曰善爲將者威振敵國令行三軍昨者傳潛逗撓無謀守陴翫寇遂至殘妖未殄鑾輅親征此所謂以賊遺君父者也乃或赦而不問則何以謝橫死之民恢用兵之略臣嘗讀史李廣之屯兵行師也無部伍行陣就善水草人人自便

不擊刀斗以自衛而廣終爲名將士卒樂用又唐高祖之備北邊也選勁兵爲游騎不齎軍糧隨逐水草遇敵則殺當時以爲得策顧於邊將中擇武勇謀略素爲衆所推服者取十人爲人付騎士五千器甲完備輕齎糗逐水草以爲利往復扞禦遇有寇兵隨時掩捕仍令烽候相望交相救應緣邊州郡守城兵帥卽堅壁以待之遇游騎近城掩殺邊寇內量出兵甲援救如此則乘城者不堅閉壘門免坐觀於勝負捍邊者不苟依郡郭可行備於寇攘雖匪良籌且殊膠柱時論頗稱之遷至翰林學士同知審官院三班景德元年權知開封府顯

閨門雍睦與人交久而無改士大夫多之暴卒年九十
二上軫惻賜贈加等有集十五卷子固述適別傳

固字仲堅幼有志節嘗著漢春秋顥器賞之以遺蔭賜
進士出身服闋讓前命願赴鄉舉許之大中祥符元年
舉服勤詞學科擢甲第解褐將作監丞同判密州歷戶
部判官判戶部勾院爲人氣調俊爽善與人交踈財慷
慨尚氣義明於吏道嘗詔鞫獄時稱平審天禧大禮成
奏頌甚工無幾卒年三十三有集十卷

楊徽之字仲猷浦城人周顯德中舉進士甲科同時登
第者有六人世宗命覆試惟徽之與李覃何曦趙隣幾

中選解褐校書郎集賢校理歷知全州就遷左拾遺
補闕太平興國初代還太宗素聞其詩名因索所著微
之以數百篇奏御且獻詩爲謝有十年流落今何幸叨
遇君王問姓名語帝稱賞累遷庫部員外郎判南曹同
知京朝官差遣會詔李昉等采輯前代文字類爲文苑
英華以徵之精於風雅分命編詩爲百八十卷歷拜左
諫議大夫知許州入判史館事加脩撰因次對上言陛
下取士之道亦已至矣然擅文章者多超遷明經業者
罕殊用且京師四方之會太學首善之地五經博士竝
闕其員非所以崇教化獎人材繇內及外之道也帝嘉

納之未幾改判集賢院坐董儼傾劉昌言出爲鎮安軍
行軍司馬事在張洎傳真宗尹開封召爲左諫議大夫
與畢士安竝充府判官東宮建屬又兼左庶子卽位拜
工部侍郎樞密直學士俄兼祕書監咸平初加禮部侍
郎二年春以衰疾求解近職改兵部仍兼祕書監入謝
命坐勞之曰圖書之府清淨無事俾卿得以養性也是
秋特置翰林侍讀學士命與夏侯嶠呂文仲竝爲之賜
宴祕閣止褒以詩得疾請告卒年八十贈兵部尚書徽
之純厚清介尚名教疾非道以干進者嘗言溫仲舒寇
準用搏擊取貴位使後輩務習趨競禮俗寢薄世謂其

知言徽之寡諸於俗唯李昉王祐深所推服與石熙載
李穆賈黃中爲文義友自爲郎官御史朝廷卽待以舊
德善談論多識典故唐室以來士族人物悉能詳記酷
好吟詠每對客論詩終日忘倦有集二十卷

澈字晏如徽之宗人也徙青州之北海建隆初第進士
竇儀典貢部謂澈文詞敏速可當書檄之任調補河內
主簿再遷青州司戶參軍知州張全操多不法澈鞫獄
平允無所阿畏太祖知其名召試禁中改著作佐郎出
知渠州江南平改通判虔州令就大將曹彬分兵以行
旣入境僞帥郭再興擁兵自固澈單騎直趨其壘諭以

朝廷威信再興卽奉符以代土豪黎羅二姓聚衆謀亂
澈率兵平之擒二豪械送闕下遷右贊善大夫知淄州
求便侍養徙同判青州三遷祠部員外郎復知淄州又
知舒州累轉祠部郎中咸平初選爲雍王府記室參軍
加度支郎中景德初選兵部郎中充留守判官坐輔導
不善免官未幾起爲祠部郎中卒年七十四子巒淳化
進士

呂文仲字子臧新安人父裕僞唐歙州錄事參軍文仲
在江左第進士調補臨川尉再遷大理評事掌宗室書
奏入朝授太常寺太祝稍遷著作佐郎太平興國中充

翰林侍讀直御書院與侍書王著更宿時書學葛湜亦直禁中太宗暇日每從容問文仲以書史著以筆法湜以字學歷左諫議大夫與陳堯叟竝兼關西巡撫使時內品方保吉專幹權酷威制郡縣訟其掎克者甚衆文仲等具奏其實反爲保吉所訟文仲素異懦且恥與保吉辯對因誣伏遂罷職旣而太宗知其由復令直祕閣踰月再爲侍讀遷起居舍人兵部員外郎同判吏部銓知銀臺通進封駁司審官院咸平三年拜工部郎中充翰林侍讀學士又知審刑院六年授御史中丞景德中鞫曹州姦民趙諫獄諫多與士大夫交遊內出姓名

七十餘人令悉窮治文仲諱堯言中司之職非徒緝紆
愆違亦當顧國家大體但籍其名更察其爲人置於冗
散或舉選對敍之日擯斥之未爲晚也上從其言三年
遷工部侍郎復爲翰林侍讀學士明年改刑部侍郎充
集賢院學士卒文仲富詞學器韻淹雅其使高麗也善
應對清淨無所求遠俗悅之有集十卷

王著字知微成都人僞蜀明經及第歷平泉百丈永康
主簿蜀平赴闕授隆平主簿太宗以字書訛舛欲令學
士刪定少通習者轉運使侯陟以著名聞改衛寺丞史
館祗候委以詳定篇韻加著作佐郎翰林侍書與侍讀

更直于御書院遷至左拾遺殿中侍御史卒

呂祐之字元吉鉅野人第進士歷右補闕直史館同判吏部南曹遷起居舍人端拱中副呂端使高麗假內庫錢五十萬以辦裝還遇風濤舟欲覆祐之悉取所得貨沉之卽止復獻海外覃皇澤詩十九首太宗嘉之仍蠲其所貸歷知制誥拜右諫議大夫賜金紫知審官院出知襄州徙壽州真宗歷拜工部侍郎翰林侍讀學士自置侍讀侍講甚艱其選至是裁七人祐之純謹長者不喜趨競所至無顯譽備顧問不能有所啓發出爲集賢院學士仍遷刑部侍郎卒年六十一有集二十卷

潘慎脩字成德莆田縣人父承祐仕閩後歸江南仕李景至刑部尚書慎脩少以父任爲祕書省正字累遷至水部郎中兼起居舍人煜歸朝以慎脩爲太子右贊善大夫煜表求慎脩掌記室許之煜卒改太常博士歷考功員外郎出補外以薦知直祕閣慎脩善奕基太宗屢召對奕因作碁說以獻大抵謂碁之道在乎恬默而取舍爲急仁則能全義則能守禮則能變智則能兼信則能克君子知斯五者庶幾可以言碁矣因舉十要以明其義累遷至右諫議大夫翰林侍讀學士卒年六十九真宗憫之錄其子汝士汝礪慎脩風度醞藉博涉文史

諱道書善清談當時士大夫與之遊者咸推其素尚然
頗恃前輩待後進倨慢人以此少之有集五卷

杜鎬字文周無錫人父昌業南唐虞部員外郎鎬舉明
經解褐集賢校理入直澄心堂江南平授千乘縣主簿
太宗卽位歷祕閣校理虞部員外郎帝問西漢賜與悉
用黃金近代爲難得之貨何也鎬曰是時佛事未興故
金價甚賤累遷直祕閣景德初置龍圖閣待制因以金
錫鎬加都官郎中從幸澶淵遇懿德皇后忌日疑軍中
鼓吹之禮時鎬先還備儀仗命馳騎問之鎬以武王載
木主伐紂前歌後舞爲對四年拜右諫議大夫龍圖閣

直學士賜襲衣金帶時特置此職儒者榮之大中祥符
中命鎬同詳定東封儀注遷給事中已又置本閣學士
遷鎬工部侍郎充其職進禮部侍郎卒年七十六錄子
渥及三孫官鎬博聞強記士大夫有所著撰多訪以古
事雖晚輩卑品請益應答無倦年踰五十猶日治經史
數十卷或寓直館中四鼓則起誦春秋性和易清素有
懿行所居僻陋僅庇風雨二十載不遷徙云

論曰宋承舊制設知制誥以代王言後又置翰林侍讀
侍講學士且因內閣增職名俾更直迭宿以備顧問數
者皆屬之鴻碩之儒要之均有繩糾輔導之責不特繹

文義摘詞藻而已冲澹如韓丕夷曠如師頴淳厚如張
茂直明敏如梁顥淹雅如呂文仲醞藉如潘慎脩清素
如杜鎬置之左右豈不有裨若呂祐之不喜趨競楊徽
之深疾倖進又重爲士風助云

宋史新編卷八十三

宋史新編卷八十四

列傳二十六

明南京戶部主事莆田柯維騏著

楊億

弟偉從子絃

晁迥

字宗慤

劉筠

薛映

楊億字大年浦城人生有毛被體長尺餘經月乃落七歲能屬文年十一太宗詔送闕下連三日得對試詩賦五篇立成太宗嘉賞命內侍送至中書又賦詩一章宰相驚其俊異上章爲賀翌日下制曰汝方髫鬣不由師訓精爽神助文字生知越景絕塵一日千里予有望於汝也授祕書省正字賜袍笏外艱服除依從祖徽之於許州益務學不倦徽之深器焉淳化中詣闕獻文改太

常寺奉禮郎仍令讀書祕閣獻二京賦命試翰林賜進士第遷光祿寺丞屬後苑賞花曲宴召賦詩億又上金明池頌明年曲宴復以詩獻卽命直集賢院至道初帝親製九絃琴五絃阮諸文士獻頌獨稱億爲優賜緋魚二年遷著作佐郎帝知其貧屢有霑賚真宗立超拜左正言因請外補就養知處州召還拜左司諫知制誥賜金紫西鄙未寧詔近臣議靈州秦守億上疏曰臣嘗讀史見漢武北築朔方平津侯譟以爲罷弊中國以奉無用之地使朱買臣等發十策以難不能對臣以爲平津賢相非不能折買臣之舌蓋所以將順人君之意爾

今靈州蓋朔方故墟自邊境屢驚兇黨倡熾曹光實守榮馬紹忠及王榮之敗資糧靡獲所失至多將士丁夫相枕而死平津所言正今日謂也賈捐之建議棄朱崖當時公卿亦有異論元帝力排衆說下詔廢之人頌其德臣以爲類靈武也必以失地爲言卽燕薊八州河湟五郡所失多矣何必此爲景德初歷判史館三年召爲翰林學士又同脩國史大中祥符中嘗以疾在告遣中使致醫視之億剛介寡合當時文士咸賴題品或被貶議者退多怨謗王欽若銜之屢挾其失陳彭年忌億名出其右相與毀訾上皆不惑其說上欲立劉德妃爲

后大臣諫不從欲得億草制億難之乃命他學士焉億
請歸省母不待報而行上親緘藥劑加金帛以賜素體
羸至是以病請解官有疾憲官劾億授太常少卿分司
西京許就所居養療嘗作君可思賦以抒忠憤歷知禮
儀院判祕閣太常寺天禧二年拜工部侍郎明年權同
知貢舉坐考校差謬降祕書監丁內艱屬行郊禮以億
典司禮樂起復工部侍郎今視事未幾復爲翰林學士
又兼史館修撰判館事權景靈宮副使卒年五十七億
文格雄健才思敏捷對客揮翰不輟細書起草一幅數
十言不加點竄學者翕然宗之朝廷典章制度及冊府

元龜國史變例多億所定人有片辭可紀必爲諷誦手
集當世述作爲筆苑時文錄數千篇性同名節常周給
親友故廩祿隨而盡留心釋典禪觀之學所著括蒼武
夷潁陰韓城退居汝陽蓬山冠鰲等集內外制刀筆共
一百九十四卷無子以從子紘爲後弟偉

偉字子奇天禧元年獻頌召試學士院賜進士及第歷
集賢校理通判單州會部卒李素合州卒二百餘人謀
殺巡檢使入鼓角門偉挺身往問曰若屬皆有父母妻
子以一朝忿而欲魚肉之乎悉令投兵籍首惡得十餘
人斬之累遷知制誥權諫院嘗曰諫臣宜陳列大事細

故何足論然當時譏其亡補遷刑部郎中爲翰林學士
進至中書舍人卒贈尚書禮部侍郎

紘字望之用蔭登仕歷官知鄞縣以億文獻賜進士出
身累擢提點江東刑獄除轉運按察使紘御下急與王
鼎王綽號江東三虎坐降知衡州徙越州至太常少卿
卒紘性嚴雖家居兒女不敢妄言笑聚書數萬卷手抄
事實名窺豹篇

晁迥字明遠澶州人第進士歷右正言直史館獻咸平
初書五十篇又獻理樞一篇召試除右司諫知制誥累
翰林學士尚書工部侍郎使契丹還奏北庭記卅史

館脩撰知通進銀臺司獻玉清昭應宮頌其子宗操
上景靈宮慶成歌真宗嘆爲措紳間美事歷拜工部尚
書集賢院學士判西京留司御史臺賜一子官河南以
就養仁宗遷禮部尚書以太子少保致仕天聖中迴年
八十一召宴太清樓子宗慤爲知制誥同預宴寵賚甚
厚進太子少傅後復召對訪以洪範雨暘之應旣而獻
斧戾慎刑箴大順審刑無盡燈頌凡五篇卒年八十四
贈太子太保諡文元迴性樂易寬簡服道復正貴勢無
所屈真宗數稱其好學長者楊億嘗謂迴書命無過
得代言之體喜質正經史疑義標括字類有以術命語

迴迴曰自然之分天命也樂天不憂知命也推理安常委命也何必逆計未然乎所著翰林集等書

宗慤字世良以蔭爲祕書省校書郎屢獻歌頌召試賜進士及第又除館閣校勘歷通判許州仁宗立累遷尚書祠部員外郎知制誥宋綬嘗謂自唐以來唯楊於陵身見其子嗣復繼掌書命今始有晁迴焉奪父喪管勾會靈觀入翰林爲學士母亡又起復擢至參知政事以疾數求罷除資政殿學士給事中數日卒贈工部尚書謚文莊宗慤性敦厚至孝篤於故舊凡任子恩皆先其人在翰林一夕草將相五制褒揚訓戒人得所宜

密詔訪邊策陳七事頗施用之

劉筠字子儀大名人第進士歷祕閣校理真宗時四方獻符瑞筠數上賦頌累遷翰林學士筠嘗草丁謂與李迫罷相制旣而謂復留令別草制筠不奉詔乃更召晏殊筠自院出遇殊樞密院南門殊愧側面而過帝久疾謂浸擅權筠曰姦人用事安可一日居此請補外以右諫議大夫知廬州仁宗卽位累進翰林學士承旨兼龍圖閣直學士同脩國史判尚書都省筠素愛廬江遂築室城中構閣藏前後所賜書帝飛白書曰真宗聖文祕奉之閣再知廬州營塚墓作棺自爲銘刻之旣病徙于

書閣卒筠景德以來居文翰之選其文辭善對偶尤工
爲詩初爲楊億所識拔後遂與齊名時號楊劉凡三入
禁林又三典貢部以策論升降天下士自筠始性不苟
合臨事明達而其治尚簡嚴晚爲陽翟同姓富人奏求
恩澤清議少之著書凡七集一子蚤卒田廬沒官包拯
少爲筠所知及拯顯奏爲立後還所沒產云

薛映字景陽唐中書令元超八世孫後家于蜀父允中
事孟氏爲給事中歸朝爲尚書都官郎中映進士及第
歷右諫議大夫知杭州映臨決蠡銳庭無留事轉運使
姚鉉移屬州當直司母得輒斷徒以上罪映卽奏情狀

苟明何必繫獄以累和氣請詔天下凡徒流罪於長吏
前對辨無所異聽遣決從之與鉉旣不協遂發鉉納部
內女口等事鉉坐貶連州文學映亦坐常召人取告鉉
狀當贖金真宗特貰之歷尚書左丞知揚州并州永興
軍拜工部尚書兼御史中丞仁宗卽位遷禮部再爲集
賢院學士判院事知曹州分司南京卒贈右僕射謚文
恭映好學有文該覽強記善筆札章奏尺牘下筆立成
爲治嚴明吏不能欺每五鼓冠帶黎明據案決事雖寒
暑無一日異也

論曰自古負高才能文章者率不能有樹立若楊億劉

錡竝擅一代文宗而挺挺大節羞效世俗浮沉以邀榮利此豈恒得哉錡陷富人之謗乃同姓不避嫌所致以彼辭華耽寂達生俟死尚復何求乎晁迥醞藉善書命躬直道不爲貴勢屈楊劉之亞歟薛映苟非私忿累德其文學吏治亦豈可少哉

謝泌

孫何弟僅

朱台符

戚綸

張去華

子師德

樂黃目

柴成務

謝泌字宗源歙州人少好學有志操第進士累遷殿中丞獻所著文十篇古今類要三十卷召試中書以直史賜緋太宗詔閣門言事非涉僥望乃許受之繇是言

路稍壅泌抗疏陳其不可復言國家圖書多失次序
嘗分經史子集爲四庫望遵復故事從之遂以泌知集
庫改左正言淳化中帝以王禹偁請詔庶官候謁宰相
須朝罷於政事堂樞密使預坐接見泌上言書曰任賢
勿貳去邪勿疑張說謂姚元崇曰外則踈而接物內則
謹以事君此真大臣之體陛下以聰明寄於輔臣自非
接下何以悉知外事且陛下囊括宇宙總攬英豪朝廷
無巧言之士方面無姑息之臣奈何疑執政爲衰世之
事乎帝卽追還前詔會修正殿施采繪泌復上疏亟命
代以丹堊且喜其忠蓋拜左司諫賜金紫錢三十萬他

日得對便殿又獎其任直敢言俄判三司鹽鐵勾院奉
詔解送國學舉人黜落旣多羣聚喧詬懷甍以伺泌出
泌請對自陳特授虞部員外郎兼侍御史知雜事蓋騶
導嚴肅都人畏避也上元觀燈泌特預召自是爲例歷
知三班通進銀臺司出知湖州再遷主客郎中知虢州
真宗初邊人屢寇泌上疏曰臣竊惟聖心所切者欲天
下朝夕太平爾雍熙末趙普錄唐姚崇太平十事以獻
時稱政治之策無出於此臣以爲先朝未盡行者俟陛
下爾議者或謂方今用兵異於開元且開元邊戎孔熾
明皇卒與之和至如漢高祖亦然此皆屈已以寧天下

豈以輕大國而競小忿乎臣又聞成康刑措由任周文景清靜不易蕭曹明皇太平亦資姚宋夫精練國政酌斟王度未聞市井之胥走塵之吏可當其任也惟陛下察往古用賢致治之道則賢者亦必盡忠竭力以輔成太平之治矣荐歷中外遷至太常少卿右諫議大夫判吏部銓卒年六十三泌性端直爲政有惠愛最後知福州代還民刻石紀去思頗好方外之學疾革服道士服端坐而逝

孫何字漢公汝陽人父庸字鼎臣顯德中獻贊聖策九篇引唐貞觀所行事以魏玄成自况命中書試補開封

兵曹掾歷殿中丞知龍州卒何篤學嗜古爲文必本經義在貢籍中甚有聲與丁謂齊名舉進士甲科歷右司諫真宗初獻五議一請擇儒臣有方略者統兵二請世祿之家肄業太學寒雋之士州郡推薦禁投贄自媒三請復制舉四請行鄉飲酒禮五請以能授官勿以恩慶例遷上覽而善之咸平二年舉入閣故事何次當待制獻疏曰六卿分職邦家之大柄也唐之盛時亦不聞分利權勑使額及玄宗侈心旣萌祖調不充於是蕭景楊釗始以地官判度支而宇文融爲租調地稅使遂開利孔以構禍階至于肅代則有司之職盡廢而言利之臣

棄臂於其間矣五代短促曾莫是思今國家三聖相承
五兵不試太平之業垂統立制在此時也所宜三部使
額還之六卿則進無掎克之慮退有詳練之名周官唐
式可以復矣是冬從幸大名詔訪邊事何上䟽謂腥羶
得計蛇豕肆行焚劫我郡縣係累我黎庶陛下爰御六
師親幸澶魏雖鎮定道路已通而德棣烽塵未息此殆
將帥或未得人邊奏或有壅闕鄰境不相救援糗糧須
俟轉輸之所致也擇將帥則莫若文武之內叅用謀臣
防壅闕則莫若凡奏邊防陛見庭問合救援則莫若督
以軍令聽其便宜運糗糧則莫若輕齎疾驅角彼趨捷

且蜂蠱有毒豺狼無厭今契丹西畏大兵北無歸路獸窮則搏物不可輕餘孽尚或稽誅奔突亦宜預備及傳潛追撓無功何又請斬潛以徇歷知制誥賜金紫掌三班院被疾賜告遣醫診視醫勉其然艾何答曰死生有命竟不聽卒年四十四何樂名教勤接士類然性卞急不能容物浙右專務峻刻州郡病焉著駁史通十餘篇有集四十卷第僅侑

僅字鄰幾少勤學與何俱有名于時咸平元年進士甲科兄弟連冠貢籍時人榮之解褐舒州團練推官會詔舉賢良方正之士僅策入第四等擢光祿寺丞直集賢

院俄知浚儀縣歷左諫議大夫知河中府歸朝復領密
刑院久次進給事中卒年四十九有集五十卷僅性端
慤中立無競篤於儒學士大夫推其履尚嘗使契丹適
當通好之始館禮過腆僅悉裁而正之務令中度其後
信使往復不易其制侑亦登進士第至殿中丞

朱台符字拱正眉山人父賦舉拔萃至殿中丞台符十
歲能屬辭嘗作黃山樓記爲當時所稱及長善詞賦太
宗廷試貢士多擢敏速者台符與同輩課試以尺晷成
一賦登進士甲科歷京西轉運副使時北邊爲梗台符
奏曰蠻夷猾夏帝典所載商周而下數爲邊害或振旅

薄伐或和親脩好歷代經營斯爲良策至於秦築長城而黔首叛漢絕大漠而海內虛逞志一時貽笑萬代此商鑒不遠也太祖深鑒往古與民休息深得制禦之道及太宗謀取幽薊師屢無功自茲益肆莫可禁止芻粟之飛輓金帛之委輸贍給賞賜不可勝數繇是國家之食貨匱於河朔矣陛下自天受命與物更始繼遷受節黎桓加爵咸命使者鎮撫其邦惟彼契丹未加渥澤非所以柔遠能邇昭王道之無偏也臣愚以爲宜赦契丹罪擇一介使以脩和好利以貨財許以關市如太祖故事使之懷恩畏威可以專力西鄙是一舉而兩得也台

符又自請往使時論建之咸平二年春旱詔求直言
符歷䟽時務優詔褒答歷拜工部員外郎度支判官景
德初爲陝西轉運賜金紫頗以刻碎爲舉職與楊賈不
協徙知郢州三年召還會執政有不喜者復出知洪州
卒於舟次年四十二台符好學喜延譽後進有集三十
卷子公佐及弟昌符俱登進士第

戚綸字仲言楚丘人父同文自有傳綸少與兄維以文
行知名第進士歷知太和縣爲諭民詩五十篇每歲時
必與獄囚約遣歸祀其先皆如期而還遷光祿丞坐鞫
獄陳州失實免官著理道評十二篇久之復授大理評

事知永嘉縣復爲光祿丞真宗卽位命爲祕閣校理詔
館閣官以舊文獻上嘉綸所著特改太常丞俄判鼓司
登聞院歷拜右正言龍圖閣待制賜金紫時初建是職
與杜鎬竝命人皆榮之綸疏陳十事一曰王畿關輔二
曰五等封建三曰復制科四曰崇國學五曰闢曠土六
曰脩貢舉七曰任大臣八曰置平糴九曰益庠軍減禁
兵十曰脩六典令式詞頗深切上爲嘉獎大中祥符元
年掌吏部選事是冬封泰山命綸同計度發運事禮成
遷戶部郎中直昭文館待制如故被詔同編東封祥瑞
封禪記會峻待制之秩又兼集賢殿脩撰建議脩釋奠

儀頒于天下立常平倉隸司典寺以平民糴皆從之三年擢樞密直學士上寵以詩祀汾陰復領發運出知杭州就加左司郎中胡則時領發運嘗居杭肆縱不檢厚結李浦綸素惡之則時爲當塗者所昵因共捃撫綸過徙知楊州維楊亦浦則巡內持之益急求改僻郡徙徐州八年與劉綜竝罷學士授左諫議大夫代還復知青州徙鄆州王遵誨奏綸謗訕坐左遷岳州團練副使易和州改保靜軍副使是冬以疾求歸改太常少卿分司南京卒年六十八綸篤於古學善談名理喜言民政頗近迂闊事兄維友愛甚厚交游以信義著稱士子謁見

者必詢其所業訪其志尚隨才誘誨嘗云歸老後得十年在鄉閭講習亦可以恢道濟世樂於薦士每一奏十數人皆當時知名士平生儉約旣沒家無餘貲有集二卜卷又前後奏議有機務利害備邊均田之策別爲論思集十卷分上下篇贈左諫議大夫

張去華字信臣開封人父誼字希賈好學不事產業詣洛陽龍門書院與宗人沆鑾浞結友故名聞都下長興中第進士歷仕晉漢至中書舍人貶均州司戶改房州司馬卒去華幼勵學敏於屬辭蔭補太廟齋郎周世宗平淮南去華時年十八嘆曰其戰未息民事不脩非馭

國持久之術因著南征賦治民論獻行在召試授御史
臺主簿屬三院議事不得預坐謂所親曰簿領之職非
壯夫所爲卽棄歸鄭州杜門不出者三載建隆初始攜
文遊京師大爲李昉所稱明年舉進士甲科拜祕書郎
直史館以歲滿不遷上章自訴因言制誥張澹盧多遜
殿中侍御史蘇頌文學膚淺願得校優劣太祖立召策
試命陶穀等考之澹以所對不應問降秩擢去華爲右
補闕朝議薄其躁進不遷秩者十六年後累遷京東轉
運使歷左司員外郎禮部郎中太平興國七年爲江南
轉運使雍熙中王師討幽州掌河北轉運事三年加陝

州未行著大政要錄三十篇以獻詔書褒美賜綵五十匹因留不遣會許王尹京命爲開封府判官就拜左諫議大夫因事貶安州司馬歷知晉州許州遷至祕書少監真宗立復拜左諫議大夫未幾遷給事中知杭州徙蘇州以疾求分司西京在洛葺園廬作中隱亭以見志改工部侍郎致仕卒年六十九去華美姿貌善談論有蘊藉頗尚氣節在營道得父同門生何氏二子教之學受代攜京師慰薦館穀竝登仕籍嘗獻元元論以養民務檣爲急真宗嘉賞命書之縑素爲十八軸列龍圖閣四壁然不飭邊幅頗爲清議所貶有集十五卷

師德字尚賢去華十子最器師德嘗欲任以官辭不
去華曰此兒必繼吾志真宗祀汾陰知河南府薛映薦
其學行又獻汾陰大禮頌于行在是歲舉進士亦爲第
一時人榮之累擢右正言知制誥判尚書刑部頃之出
知潁州荐歷中外遷至吏部郎中旣而拜左諫議大夫
罷知制誥師德孝謹有家法不交權貴時相頗不之悅
然亦多病在西掖九年不遷卒于官有文集十卷

樂黃目字公禮宜黃人世仕江左李氏父史字子正入
朝爲平原主簿舉進士太宗惜科第不與旣而復賜及
第上書言事擢著作佐郎知陵州獻金明池賦召爲三

館編脩荐歷中外累遷至職方員外郎知商州史前後
臨民頗以賄聞俄告病聽解職分司西京咸平五年郊
祀表賀得召對真宗見其矍鑠不衰又知篤學盡取所
著書藏祕府復授舊職與黃目同在文館人以爲榮後
判留司御史臺卒年七十八史在兩朝獻所著貢舉事
二十卷登科記三十卷題解二十卷唐登科文選五十
卷孝弟錄二十卷續卓異記三卷廣孝傳五十卷總仙
記一百四十一卷廣孝新書五十卷上清文苑四十卷
所著又有太平寰宇記二百卷總記傳百三十卷坐知
天下記四十卷商顏雜錄廣卓異記各二十卷諸仙傳

二十五卷宋齊丘文傳十三卷杏園集李白別集神仙
宮殿窟宅記各十卷掌上華夷圖一卷又編已所著爲
仙洞集百卷史博而寡要云五帝三王皆仙去論者嗤
其詭誕黃目舉進士歷官判三司三勾院天禧初馬元
方奏黃目不舉職乃分三勾院以三人掌之遂罷任奉
朝請踰月拜兵部員外郎知制誥充會靈觀判官朝議
以黃目屬辭淹緩遷右諫議大夫權知開封府仁宗升
儲拜給事中兼左庶子歷知審官院以風疾題品乖當
改知通進銀臺司兼門下封駁事數月求外任得知毫
州卒年五十六黃目溫柔簡默爲吏處劇亦無敗事有

集五十卷又撰學海搜奇錄四十卷郡國志二十卷兄黃裳弟黃庭黃裳孫滋竝進士及第

柴成務字寶臣濟陰人父自牧第進士能詩至兵部員外郎成務乾德中京府拔解太宗素知其名首薦之遂中進士甲科歷戶部郎中爲光祿少卿俄奉使高麗遠俗尚拘忌以月日未利拜恩稽留朝使成務貽書往反開諭大體國人信服後自京東轉運使召拜司封郎中知制誥時以宰相呂蒙正姻嫌辭職不許俄與魏庠同知京朝官考課又與庠同知給事中事蜀寇平使峽路安撫改左諫議大夫知河中府真宗卽位遷給事中知

梓州歷青州楊州判尚書刑部本司小吏倨慢成務怒而笞之吏擊登聞鼓訴冤有詔問狀成務嘆曰何面目據堂決事邪乃求解職卒年七十一成務有詞學文集二十卷然爲郡乏廉稱云

論曰謝泌朱台符孫何戚綸竝喜論建輒援古昔爲言可以徵致君匡世之志矣張去華負才競進世少其浮薄樂黃目劇無敗事且著述世其家吏而儒者也孔門論士有曰奉使不辱命柴成務以之

宋史新編卷八十四

安權知開封府拜給事中知審官院維岳陳乞外遷小
州上嘉其靜退特授海州刺史又知蘇州素病風上以
吳中多食魚蟹乃徙壽州仍命醫馳療之卒年七十六
贈兵部侍郎維岳性仁恕其爲轉運使按部至泗州慮
獄法掾誤斷囚至死懼獲罪泣曰有八十老母在維岳
憫之爲任其咎後朝制按問而維岳坐贖金云

王陟者上黨人第進士累遷判三司鹽鐵勾院初真宗
念京府之舊將加擢用會有言其在貢部舉子有納賄
成名者恃恩寵希顯要僦大第以居事遂寢

張雍德州人治毛氏詩開寶六年中第釋褐東關尉太

宗遷至祕書丞充開封府推官坐冤獄免後復用歷
戶部使西川轉運使知梓州蜀州青城民王小波李順
作亂衆至萬人雍訓練士卒募彊勇守城輦綿州金帛
以實帑藏督僚佐陳世卿等治戎器伐木爲竿銷鍾爲
鐻紐布爲索賊設梯衝火車攻城急發機石碎之火箭
雜下賊稍退復治攻具城西北隅雍給曰軍士趣治裝
吾將開東門擊賊陽遣步騎五百臨東門賊升牛頭山
瞰城內信然伏精兵萬餘山之東隅以待雍卽召敢死
士百輩縋而下盡焚其攻具自午達申殆盡賊以爲神
凶黨數乘城進戰皆不利一日北風晝晦賊乘風縱火

急攻北門雍與盧斌等領兵掘門立矢石間固守不動賊爲之少却長圍八十餘日會援兵至賊始潰去事聞手詔褒美擢雍等官雍累遷兵部侍郎同知審官院景德四年車駕朝陵判留司尚書省出知鄧州大中祥符元年請老以尚書右丞致仕誥命未至而卒年七十雍性鄙吝莅事勤恪善爲米鹽苛察以肅下恃其清幹受過於時益矯厲以取名譽所至藩鎮宴犒率皆裁節聚公錢爲羨餘輸宮帑集會賓佐饔食而已在三司置簿籍有按前急馬前急急中急之目頗爲時論所誚姿貌魯朴始登科爲滕中正壻中正子錫世寧咸笑之中正

此人異日必顯達壽考非汝曹所及錫兄弟雖有名然終不越郎署亦無耆年者

董儼字望之洛陽人第進士歷右補闕知光州儼狂躁務進上書乞還京師太宗怒降爲祕書丞歷刑部郎中三司度支副使又坐翟馬周事左官累遷判吏部銓加工部侍郎儼與知雜御史王濟姻家託濟言於西川轉運黃觀求薦已知益州未幾觀領陝西轉運得對儼謂其必薦已他日面陳黃觀無操持恐爲執政所使妄存論薦俾臣遠適真宗不之詰數日王濟見帝述儼私託且言儼性矯詐臣語觀不可許真宗不欲暴其事乃出

儼知青州儼復請對言爲權臣所擯上慰遣之久而不去乃曰爾自告黃觀求知益州復有何人排斥乎遣使陝西質問觀觀具述儼求薦及曩時爲儼所傾事詔樞密直學士劉綜與御史雜治之儼坐責山南東道節度行軍司馬不署州事後會赦起知郢州病疽卒儼俊錄有材幹第寡學術無操行所至厚納貨賂嘗令引贊吏改製朱衣每夕納儼第而潛以輕帛製衣易之其鄙屑如此

魏廷式字君憲宗城人太平興國五年中第釋褐朗州法曹掾歷戶部員外郎知利州李順爲盜就命充陝西

至益州路轉運使後入奏事太宗謂曰有事當白中書
廷式曰臣三千七百里外乘驛而至以機事上聞願取
斷宸衷非爲宰相來也卽不時召對問方略稱旨賜錢
五十萬令還任召入判大理寺出知宋潭二州又知桂
州遷至工部郎中真宗累拜右諫議大夫知審刑院出
知涇州卒廷式剛果敢言爲人主厚遇然性傾險喜中
傷人士君子憚其口而鄙其行

盧琰字錫圭淄州人父浚右諫議大夫琰第進士歷開
封府判官會獄空真宗有詔獎之歷拜右諫議大夫知
永興軍府再爲河北轉運使琰勤吏職所至以幹集聞

頗知命嘗語親舊曰官五品服三品天不與者壽爾卒年五十九子士宗自有傳

宋搏字鵬舉萊州掖人治毛氏詩開寶八年宋準典貢部得第調補遂寧尉歷遷至司封員外郎河東轉運使時邊事未息屯師甚廣搏經制漕運以幹治稱連徙他州郡輒乞留真宗有詔褒飭朝議以搏善職就加祠部郎中賜金紫既而入判三司勾院踰月爲戶部副使又進秩刑部郎中卒子舜元登進士第

凌策字子奇宣州涇人世給事州縣策幼孤厲志好學進士歷官職方員外郎直史館知廣州代還知青州

真宗東封以供億之勤超拜都官郎中入判三司三
院出知揚州改江南轉運使拜右諫議大夫集賢殿學
士知益州初策登第夢人以六印加劍上遺之其後往
劍外凡六任云策所至有治迹真宗嘗稱其敏而有斷
蜀還有意擢用會已病命知通進銀臺司兼門下封駁
事糾察在京刑獄未幾拜給事中權御史中丞以疾表
求典益遷工部侍郎從其請卒

楊覃字申錫浙人從錢俶歸朝爲禹城尉太平興國八
年第進士本名蟬太宗爲改焉淳化中轉屯田員外郎
同判壽州巡撫使潘慎脩上其績詔嘉獎就命知州事

丁內艱州民列狀乞留詔奪情時田重進爲永興節度
選覃與林特同判軍府事重進不法覃事多抗執觸其
怒覃表求徙任不許遷至屯田郎中判三司磨勘憑由
理欠司嘗獻時務策五篇出爲陝西轉運使時西鄙屯
田調役甚繁副使朱台符務有爲而覃務循舊坐不協
徙知隨州王超節制漢東覃移唐州景德二年召歸屬
河北兵革之後命詣諸州巡撫振給之出知潭州王師
討宜賊軍須多出長沙詔書褒勞加刑部郎中大中祥
符二年代馮亮爲淮南江浙荆湖制置發運使月餘改
太常少卿直昭文館知廣州覃勤於吏事所至以幹濟

稱南海有蕃舶之利守者多致謗議惟覃以廉著遠人便之加右諫議大夫卒從弟玠從子侃傳竝登進士第侃後名大雅自有傳

陳世卿字光遠南劔人登進士第歷度支員外郎荆湖北路轉運使屬澧州慈利縣下溪等四州蠻人侵縣境地四百餘里朝命世卿與閤門祇候史方知澧州劉仁霸同領兵討之遂還所侵地標正經界取其要領又令納所掠漢口千餘復置澧川武口等砦以控制之自是平定詔嘉獎還朝屢述溪洞利害召對真宗器其材復自言願効用於煩劇乃授祕書少監知廣州郡有計口

買鹽之制不便於民至卽奏除之未幾卒

李若拙字藏用京兆人父光贊貝冀觀察判官若拙蔭補太廟齋郎復舉拔萃授大名府戶曹參軍又舉進士上第授密州防禦推官登賢良方正直言極諫科太祖嘉其敏贍改著作佐郎上書陳乞爲執政所惡出監商州坑冶遷太子左贊善大夫以官稱與父名同辭不許太平興國二年知乾州詿誤削籍流海島後復官歷右補闕同勾當河東轉運兼雲應等八州事又同掌水陸發運司雍熙二年假祕書監使交州黎桓制度踰僭者拙旣入境卽遣左右戒以臣禮繇是桓聽命燕饗日以

奇貨異物列于前若拙一不留盼上謂其不辱命遷
居舍人充鹽鐵判官歷兵部郎中充史館脩撰俄知制
誥以疾改右諫議大夫車駕北巡判留司御史臺旣而
使河朔按邊事知昇貝二州卒子繹

繹字縱之幼勤愿自脩初以父使交趾有勞補太廟齋
郎改太常寺太祝舉進士中第除將作監丞累遷太常
少卿再知延州繹所至頗稱治自以父官在外意不自
得作五知先生傳謂知時知難知命知退知足也嘗兩
知鳳翔府至是又徙鳳翔尋爲右諫議大夫卒

陳知微字希顏高郵人進士甲科歷戶部判官京東轉

運副使奏還東平監所侵民田六百八十家又決古廣濟河通運路罷夾黃河歲減夫役數萬計遷右司諫徙荆湖南路轉運使召還拜比部員外郎知制誥累官判司農寺糾察在京刑獄天禧二年加玉清昭應宮判官卒知微沉厚有材幹不務皦察時人許其處劇惜其母老不克終養有集二十卷子堯卿進士及第

論曰宋祖重監司守今之選至太宗真宗彌加飭勵凡有興利剗蠹理繁劇號幹敏者率褒賚而寵擢之若喬維岳等皆是已盧琰宋搏凌策陳世卿其操行無所私稽維岳則仁恕也李若拙則凝重也張雍楊覃則脩

潔也至於董儼魏廷式陳知微不免有貪競險刻虧
之累豈所謂才勝德者歟

上官正

康保裔

秦傳

盧斌

周審玉

裴濟

李繼宣

張旦

張煦

張佶

上官正字常清開封人少舉三傳初歷作坊副使劔門
都監李順之黨趨劔門正與監軍宿翰合擊斬馘殆盡
奏至詔書獎飭超正爲六宅使劔州刺史充劔門部署
翰自供奉官擢崇儀使領昭州刺史餘寇匿山谷剽劫
爲患正諭降之未幾加峯州團練使與雷有終並爲西

川招安使代王繼恩正木彊好凌人自謂平賊有勞受人主知無所顧忌數面攻兩川官吏之短而暴揚之衆積怨怒多上章訴其不法者太宗賜手札戒諭曰言者君子之樞機樞機之發榮辱之主不可不慎也儻自恃無瑕而好面攻人之短豈謂喜怒不形於色耶當以和輯遠民爲念斯盡善矣正上表謝真宗立累遷至洛州防禦使歷知同州再表引年授左龍武軍大將軍平州防禦使分司西京尋以本官致仕卒

康保裔洛陽人祖志忠後唐長興中討王都戰歿父再遇爲龍捷指揮使建隆初從征李筠又歿於陣保裔在

周朝屢立功太祖詔保裔代父職歷事太宗真宗遷彰國軍節度并代都部署徙知天雄軍并代人列狀請留詔褒之復爲高陽關都部署契丹兵大入諸將戰于河間保裔選精銳赴之會暮約詰朝合戰遲明敵圍之數重衆勸易甲馳突以出保裔不可遂決戰二日多殺傷蹴踐塵深二尺兵盡矢絕援不至死之贈侍中錄其子繼英繼彬繼明繼宗孫惟一繼英等入謝真宗惻然謂左右曰保裔世有忠節深可嘉也又封其母妻保裔謹厚好禮喜賓客善騎射弋飛走無不中嘗握矢三十引滿以射筈鏑相連而墜貸公錢數十萬勞軍沒後親

吏鬻器玩以償上知之復厚賜焉繼英至左衛大將軍
貴州團練使嚴於馭軍厚於撫宗族家無餘財云

秦傳序江寧人淳化五年充夔峽巡檢使李順之亂城
中乏食傳序出囊橐服玩盡市酒肉以犒士卒慰勉之
城壞傳序赴火死傳序家寄荆湖間子奭溯峽求父屍
溺死人以爲父死於忠子死於孝奏至太宗嗟惻久之
錄其次子賜其家錢十萬

盧斌開封人以筆札事晉邸太宗卽位補殿直雍熙中
領兵屯霸州會大舉北伐令以五千騎隨曹彬抵岐溝
時契丹據河王師乏水斌請以千弩斫砦契丹遁去遂

移軍夾河旣克涿州令斌以萬人戍守會食盡大兵
還斌因言涿州深在北境守之無利今若還師必須結
陣而去以一陣之役比於固守其利百矣復慮遼人乘
便剽襲宜爲之備彬以爲然遂令斌擁城中老幼竝狼
山南還易州彬之旋也無復行伍果爲契丹所乘諸將
皆被譴斌亦下樞密院問狀帝聞其掌議棄涿州遂釋
不問以爲霸州破虜軍緣邊巡檢歷梓遂十二州都巡
檢使帝諭以兵事便宜不須中覆歷擢西京作坊使領
誠州刺史斌在川陝六年以孤軍禦寇累立戰功表求
入奏帝遣諭曰俟妖孽盡殄當召汝旣而賊黨集梓縣

漢三州境上斌往平之未幾代還帝親加勞問拜東上
閣門使檢校左僕射加食邑三百戶厚賚之尋命爲銀
夏兵馬鈐轄遣與李繼隆等討李繼遷改授靈環路鈐
轄領兵二萬爲前鋒令於烏白池與諸軍會斌謂李繼
隆曰靈州抵烏白池月餘方至若自環州橐駝路裁十
日程卽不俟詔而往與諸將失期不見賊而還俄徙屯
寧州以疾召歸勾當軍頭引見司卒

周審玉開封人周顯德初蔭補殿直太祖累遷西京作
坊使雍熙中契丹犯塞潘美屯師定州審玉爲監軍嘗
與敵戰而先鋒劉緒陷於賊審玉躍馬趣擊拔緒而還

淳化中知貝州有驍捷卒戍州者三十七人謀殺審王以叛椎虞候趙咸雍爲首審玉覺之與轉運使王嗣宗率兵悉擒其黨磔咸雍於市咸雍父鱗晉天福中嘗誘契丹屠州城至是五十年而其子戮於都市舊老猶記其事咸異之審玉以功領順州刺史至道初徙并州鈐轄咸平初知鳳翔府以目疾代還奏朝請母終謂人曰僕齒髮遲暮而未能辭祿仕者以母在也今可行其志矣拜章請老得千牛衛大將軍致仕卒

裴濟字仲溥聞喜人少事晉邸太宗卽位補殿直累遷西上閣門使定州都監鈐轄尋知州事淳化中爲鎮州

行營鈐轄又與李繼隆擊賊於唐河短兵陷陣賊大敗走優詔褒美初繼隆以濟性剛不悅之及是撫濟恨相知晚在鎮定凡十五年威績甚著歷知天雄軍咸平初李繼遷叛以濟領順州團練使知靈州兼都部署至州二年謀緝八鎮興屯田之利民甚賴之其年清遠軍陷夏人大集斷饗道孤軍絕援濟刺指血染奏求救甚急兵不至城陷死之上聞嗟悼特贈鎮江軍節度三子竝優進秩濟兄麗澤弟麗正竝進士及第

李繼宣浚儀人乾德中補右班殿直年十七命往陝州捕虎殺二十餘生致其二及一豹以獻初與明德皇后

兄名同太宗爲攻焉雍熙三年曹彬北征繼宣時爲貝
州監軍從先鋒李繼隆至方城力戰三日大軍繼至遂
克固州又乘勝追北連敗之斬其酋賀恩相公大軍還
雄州取芻糧遇契丹新城疾戰至暮繼宣中十創劒及
堯鏊明日復戰繼隆爲敵所邀繼宣以所部兵拔之且
戰且行奪涿河數日乃至涿州及棄州保岐溝關又戰
拒馬上追奔至孤山契丹乃引去以功超授崇儀使代
王繼恩爲易州駐泊都監後爲高陽關行營都監又爲
鎮定高陽關三路排陣都監咸有破契丹功徙知保州
又徙定州行營都監又改高陽關遷至南作坊使爲鎮

州行營鈐轄及權知威虜軍又屢有功咸平四年拜西
上閤門使領康州刺史爲前陣鈐轄與秦翰楊延昭楊
嗣分屯靜戎威虜敵至會師于威虜延昭嗣輕騎先赴
羊山繼宣留壁赤虜止以二騎繼進至則延昭嗣適爲
敵所乘繼宣卽召赤虜之師與翰合大戰敵走上羊山
繼宣逐之環山麓至其陰馬連中矢斃凡三易騎進至
牟山谷大克捷詔書稱獎特加檢校官及食邑明年徙
定州鈐轄杆契丹于唐河未幾受詔與內殿崇班王汀
代楊延昭楊嗣爲緣邊都巡檢使望都之敗敵騎剽郡
縣又寇靜戎繼宣未嘗出戰爲汀等所發降爲如京副

使後還舊秩歷擢鎮定兩路鈐轄進東上閤門使召還
改鄆州部署加四方館使以疾授西京水南都巡檢使
卒

張旦趙州人勇敢善射以經學中第至國子博士淳化
中知陵州州無城堡兵不滿三百會李順賊黨數萬來
攻旦修戰具置鹿角砦驅市人與戰大敗之詔書褒美
遷省郎賜緋魚由是知名西川招安使上官正薦知雅
州賜金紫遷至兵部員外郎又改尚食使知德清軍景
德中契丹入寇旦與其子利涉戰沒贈旦左衛大將軍
深州團練使利涉崇儀副使錄四子官又虎翼都虞候

胡福金創徧體猶奮劒轉聞副指揮使尚祚能運大槓
並多所擊殺衆寡不敵遂與指揮使張睿劉福都頭輔
能等四人俱死之各贈官有差

張煦字輔暘開封人開寶末補府中牙職雍熙中歷內
殿崇班鎮定等路都巡檢使契丹騎兵剽境上煦以所
部斬首數十走之有詔褒美拜供備庫副使歷知保安
軍咸平中王均亂蜀以煦爲綿漢劒門路都巡檢使以
功就遷正使徙益州都監夏人寇邊再改邠寧環慶路
鈐轄兼巡檢安撫都監累躡寇入賊中掩殺甚衆復有
褒詔旣而移西路與張凝等援靈武至鎮戎聞靈武已

陷復還本任與凝入西夏境夏人率衆邀戰大敗之凝按部歸環州道爲敵所邀煦聞自慶州赴之一夕與凝會射殺其大將景德初復爲涇原儀渭鎮戎鈐轄再知環州宜州陳進反命副曹利用討之賊平改如京使知懷州累遷西上閣門使歷知諸州卒煦明術數善相宅時稱其妙

張佖字仲雅華州人初名志言父昉殿中少監佖少有志節用蔭補殿前承旨歷州縣遷至國子博士咸平中擢至利州路轉運使有薦其武幹者授如京使涇原鈐轄兼知鎮戎軍徙麟府路鈐轄夏人來寇佖親射殺酋

帥俘獲甚衆詔書褒之景德中爲益州鈐轄威惠並著
蜀人久猶懷焉祥符中又爲鄜延鈐轄馬知節薦知秦
州遷至騏驎使佶至州置砦拓疆邊部頗怨又臨渭置
采木場戎人不之爭移帳而去佶不甚存撫亦不奏加
賚賜邊人追悔引衆劫掠爲佶所敗議者又欲加恩宗
哥立遵等族以扼平夏佶請拒絕之朝廷始務寧邊以
佶輕信易事徙邠寧路鈐轄天禧中擢官至西上閤門
使復爲涇原鈐轄卒佶涉獵書史好吟詠勇敢善射有
方略其總戎護塞以威名自任

論曰昔楚王伐吳見怒蛙而軼之所以勗士大夫也然

則忠勇之臣生被寵榮死霑褒恤固勵世之常典乎上
官正等或奮儒生或起門蔭牙校居然負將帥材方妖
孽亂蜀黠虜擾西北諸人者守封疆冒鋒鏑咸著勞績
若裴濟張旦康保裔秦傳序隕首無避其節尤偉云

王延德

常延信程德玄
魏震張質附

楊允恭

秦彝

謝德權

閻日新靳懷德附

王延德東明人父溫宣祖掌畿甸兵與厚善延德方總
角宣祖愛其謹重召置左右太宗尹京署爲親校專主
庖膳尤被倚信卽位每延訪外事自御廚副使遷正使
加尚食使改皇城使進至昭宣使加領平州防禦使真

宗嗣位改領懷州出知華州上幸大名爲東京舊城都
巡檢使以病請告遣還本郡卒贈邕州觀察使延德所
至好撰集近事史官修太祖太宗實錄多訪國初事上
太宗南宮事迹三卷同時又有大名人王延德亦緣晉
邸進歷事真宗終左千牛衛上將軍知鄆青二州嘗以
罪貶秩旣而復之人頗惡其傾險云

常延信并州人祖思仕周爲節度使延信遷至六宅使
領郡職宋初歷梓遂十二州都巡檢使太平興國初秩
滿留再任歷襄鄧宋曹等州都巡檢使遷至左監門衛
將軍屢部徒脩護河防改左領軍左屯衛二將軍充西

京水南都巡檢使有盜掠彭婆鎮及甲馬營馳往悉擒之咸平中歷太康鞏縣二監軍卒

程德玄字禹錫榮澤人善醫術太宗尹京邑署押衙卽位累官判四方館事領本州團練及防禦使坐市秦隴竹木爲王仁贍所發責授東上閣門使領本州刺史是冬車駕幸魏府命總御營四面巡檢掌給諸軍資糧德玄以舊恩益被親信趨附者甚衆或言其交游太盛遂出爲崇信軍節度行軍司馬後復拜慈州刺史歷知環鳳慶三州咸平中知并州兼并代副都部署移鎮州代歸卒贈鄭州防禦使

魏震不知何許人初用祖蔭當補廷職自以習詞業不
屑就太宗在藩邸有薦其材者召置左右卽位歷供奉
官雍熙初溫州進瑞木成文震作詩賦以獻拜崇儀副
使知保州會諸將北伐爲幽州西北路鈐轄下飛狐蔚
州以功就遷爲使知蔚州再知保州移秦州鈐轄歷知
廬澶二州進至東上閤門使知鳳州坐事免起爲洛苑
使知洪州已復舊秩知定代二州竝兼行營鈐轄卒
張質字守朴高
隸樞密院兵房頗爲趙普曹彬所
知累官右神武
衛二大將軍轉都承旨質練習事
程精敏端慤未
有過本院吏罕有遷至都承旨者真

宗素知質廉謹故以授之嘗召問五代以降洎國初軍
籍更易之制且命條具利害質纂上三篇目曰兵要帝
覽而善之質好養生之術老而不衰以是多接方士隱
人然語不及公家事卒年七十四

楊允恭綿竹人少倜儻任俠乾德中丁德裕討賊至州
允恭以策干之署綿漢招收巡檢賊平補殿前承旨太
平興國中歷廣連都巡檢使以海鹽盜入嶺北民犯者
衆請建大庾縣爲軍官輦鹽市之詔建爲南安軍自是
少冒禁者有海寇聚黨凡五百餘允恭造輕舠擒斬其
魁餘黨匿山谷伐木開道悉殲焉又抵漳泉賊所止處

盡奪先所劫男女六十餘口還其家詔書嘉獎轉供奉
官詔歸改內殿崇班時緣江多賊命督江南水運以功
轉洛苑副使江淮兩浙都大發運摩畫茶鹽捕賊事轉
西京作坊使緣江權務廢置事宜鹽鐵使陳恕等是其
議詔從之卽命爲發運使始改摩畫爲制置巢廬江二
縣舊隸廬州道遠多寇民輸勞費允恭請以二縣建軍
詔許之淮南十八州軍其九禁鹽民利商鹽賤販者益
衆至有持兵器往來爲盜者允恭請悉禁而官遣吏主
之三司駁其議允恭再三爲請太宗從之是歲收利巨
萬允恭與王子興蔡義同主茶鹽之任多作條制遂變

新法真宗卽位改西京左藏庫使議華川峽鐵錢之弊
未卽行俄知通利軍兼黃御河發運使會議減西鄙屯
兵以息轉餉召允恭等往經度允恭因建議自環州入
積石抵靈武其費頗煩莫若用諸葛亮木牛之制以小
車發卒分鋪運之旁設兵衛以防寇爲議者所沮而止
復遣之任又議江淮鹽鐵使陳恕力爭詔從允恭議加
領康州刺史王均亂蜀以爲荆湖江浙都巡檢使卒初
李順兄自榮據綿竹允恭兄允升弟允元率鄉里子弟
併力破之又爲王師鄉導執自榮詣劔門以獻詔竝授
縣令明年召赴闕授允升右贊善大夫允元大理評事

允恭子可咸平元年進士喜屬文有吏幹

秦義字致堯江寧人世仕江左父承裕建州監軍使知州事李煜之歸朝也承裕遣義詣闕上符印太祖悅其趨對詳謹補殿直太平興國中有南唐軍校馬光璉等亡命荆楚結徒爲盜義受詔縛光璉以獻積勞改西頭供奉官歷提點淮南西路茶鹽得羨餘十餘萬遂與允恭同爲江淮制置擢授閤門祗候兼制置繁稅咸平中淮南榷鹽荆湖捕盜俱有勞累遷供備庫使知江陵府坐舉官不如狀削秩復起漸還舊秩充廣州鈐轄遷至園使知泉州卒義好爲詩喜賓客頗有士風歷財貨

之任凡十餘年精勤練習號爲稱職

謝德權字士衡福州人父文節初仕王氏後入南唐爲
饒州團練使周世宗南征文節獨擐甲度大江潛覘敵
壘吳人號爲鐵龍後守鄂州拒宋師戰沒李煜署德權
莊宅副使歸宋補殿前承旨累勞遷至閤門祇候廣韶
英雄連賀六州都巡檢使代歸堤點京城倉草場命廣
京城衢巷會兇人劉曄僧澄雅訟執政與許州民陰構
西夏爲叛者眞宗詔溫仲舒謝泌鞫問德權監之旣而
按驗無狀對使殿泌曰追攝大臣獄狀乃具德權曰若
使大臣無罪受辱則人君何以使臣臣下何以事君仲

舒曰德權所奏甚善帝乃可之命城新樂縣遷供奉官
又命浚北平砦濠葺蒲陰城又遷內殿崇班提轄三司
衙司德權爲設條制勢家不得避重役上稱其有守又
命提總京城四排岸領護汴河兼督輦運建議廢京師
鑄錢監徙西密務于河陰大省勞費政崇儀副使兼領
東西八作司祥符東封命同計度發運遷供備庫使預
修玉清昭應宮與同事劉承珪議不合日忿爭不能奪
遂求罷復領京城倉草場導金水河自皇城西環太廟
十餘里出知泗州進秩西染院使遣之德權清苦好興
功利多所經畫見官吏徇私者必面斥所至整肅然有

采察纖微聞于上爲衆所惡云

閻日新宿州人少爲本州牙職補三司使役吏淳化中
選隸壽王府主郎中記簿真宗累遷如京使領萬州刺
史上朝陵東封皆命爲行宮使改文思使日新起胥吏
好云爲以進取屢請對多所建白且自陳筋力尚壯願
正授刺郡守邊城以効用俄真拜坊州刺史知渭州兼
涇原路駐泊鈐轄後歷數州終右領軍衛大將軍昭州
團練使

靳懷德高唐人祖昌範殿中丞父隱禹城令懷德太平
興國中明法解褐廣安軍判官歷虞部比部員外郎通

判莫州知德州咸平中契丹入寇懷德固守城壁有詔褒之徙知密州換如京使知邳州懷德本名湘與寇準父名同景德中準方爲相懷德素遊其門因改焉俄知滄州吏民借留累遷益州鈐轄加領長州刺史懷德歷官以強幹稱然酗酒多失將行別詔戒勗就遷北作坊使在劔外軍民甚畏愛之復以善職入拜西上閣門使改領昭州刺史知澶州是州居水陸之要悉心撫治頗著聲譽又知陝州歸闕卒

論曰宋初用人之塗頗廣苟有知能可當事任不必明經射策咸被採拔得效其所長而恩寵與文吏等觀王

延德以下十一人者槩可見矣若楊允恭秦義閑於
略區畫山海之利及漕餉之宜經費賴之謝德權清強
幹敏力爭大臣不可受辱與漢賈誼之議無異斯最優
者乎

宋史新編卷八十三